



AN tACHT CORR-THRÁDÁLA, 1995

CONTAE CHIARRAÍ

FODHLÍTHE (CORR-THRÁDÁLA) 2012

(GORT AN AONAIGH, CILL ORGLAN, CO. CHIARRAÍ)

CONTAE CHIARRAÍ
FODHLÍTHE (CORR-THRÁDÁLA) 2012
(GORT AN AONAIGH, CILL ORGLAN, CO. CHIARRAÍ)

Ag baint leas as na cumhachtaí a tugadh dóibh in Alt 6 den Acht Corr-Thrádála, 1995, deineann Comhairle Contae Chiarraí na Fodhlíthe seo a leanas maidir le Corr-Thrádáil ar Ghort an Aonaigh, Cill Orglan, Co. Chiarraí a rialú, a rialáil, a stiúradh agus a riaradh.

LUA:

Luaitear na Fodhlíthe seo mar na Fodhlíthe (Corr-Thrádála) Comhairle Contae Chiarraí 2012 (Gort an Aonaigh, Cill Orglan, Co. Chiarraí). Leis seo beidh na Fodhlíthe (Corr-Thrádála) Comhairle Contae Chiarraí 1997 maidir le Gort an Aonaigh, Cill Orglan, Co. Chiarraí arna aisghairm.

1. MÍNITHE:

Sna fodhlíthe seo beidh feidhm ag na mínithe seo a leanas-

Ciallaíonn “an tAcht” An tAcht Corr-Thrádála, 1995.

Ciallaíonn “an Chomhairle” Comhairle Contae Chiarraí.

Ciallaíonn “Oifigeach Údaraithe” duine a cheapfar faoi Alt 10 den Acht le bheith ina oifigeach údaraithe.

Ciallaíonn “Corr-Thrádáil” earraí a mhiondíol in áit (lena n-áirítear bóthar poiblí) ar a bhfuil rochtain ag an bpobal ó cheart nó in aon áit eile ar limistéar corr-thrádála í.

Ciallaíonn “Limistéar Corr-Thrádála” talamh a bheidh ainmnithe i bhfodhlíthe faoi Alt 6 den Acht mar limistéar corr-thrádáil a sheoladh.

Ciallaíonn “Ionad /Spás/Cuas Corr-Thrádála” an t-achar aonair is mó a fhéadfaidh duine a bheith i mbun corr-thrádála sa Limistéar Corr-Thrádála a shealbhu, ag a bhfuil uimhir ar an Learscaíl a ghabhann leis na fodhlíthe seo.

Ciallaíonn “Ceadúnas Corr-Thrádála” ceadúnas arna dheonú faoi Alt 4 den Acht.

Ciallaíonn “Corr-Thrádálaí/Sealbhóir Ceadúnais” duine ag a bhfuil ceadúnas corr-thrádála de bhun “an Achta” agus na bhfodhlíthe seo lena n-áirítear a s(h)eirbhíseach agus/nó a g(h)níomhaire.

Ciallaíonn “Ceart Margaidh” ceart a thugtar le díolúine nó le reacht aonach nó margadh a thionscnamh, is é sin le rá, comhthionól ceannaitheoirí agus díoltóirí chun tráchtearraí a dhíol.

Ciallaíonn “Feithicil” agus foláinn aon gléas, inneallghluaiste nó a mhalairt, chun daoine, táirgí margaidh, nó aon earraí nó nithe a iompar.

Ciallaíonn “Stalla” agus foláinn aon stalla nó both, barra, cairt, leantóir, carbhán, feithicil nó gléas iompair rothach nó soghluaiste a úsáidtear chun corr-thrádála.

Ciallaíonn “Díol” comhaontú nó tairiscint chun ní a dhíol, nó ní ar díol a thaispeáint, nó tairiscint a lorg chun ní a cheannach.

2. DÍOLÚINTÍ:

Mar a shainítear in Alt 2 den Acht, ní fholáíonn corr-thrádáil:-

- (a) díol ar ceant (seachas ceant Dúitseach) ag sealbhóir ceadúnas nó cead ag a bhfuil feidhm de thuras na huairé faoi na hAchtanna um Cheantálaithe agus Gníomhairí Tithe, 1947 go 1973
- (b) díol le duine san áit ina gcónaíonn sé nó ina seolann sé gnó
- (c) díol a suíonn an díoltóir ina leith –
 - (i) go n-úsáidtear na brabúis as chun críocha carthanúla nó críocha eile nach bhfaightear aon bhrabús príobháideach as, agus
 - (ii) nach bhfaibhreoidh aon luach saothair, díolaíocht, gnóchan ná brabús as chuig an díoltóir nó a sheirbhísigh nó a ghníomhairí.

3. AINMNIÚCHÁIN:

- 3.1 Leis seo ainmníonn an Chomhairle an limistéar ar Ghort an Aonaigh, Cill Orglan, Co. Chiarraí atá marcáilte le dath dearg ar an léarscáil atá leis seo mar limistéar mar a bhfuil cead Corr-Thrádáil a sheoladh (ar a dtugtar sna Fodhlíthe seo “an Limistéar Corr-Thrádála”).
- 3.2 Ní ghabhfaidh duine do Chorr-Thrádáil i gCill Orglan ach amháin sa limistéar corr-thrádála.
- 3.3 Ní ghabhfaidh duine do Chorr-Thrádáil sa limistéar corr-thrádála ach amháin Déardaoin agus/nó Dé hAoine in aghaidh na seachtaine.

4. CEADÚNAIS CHORR-THRÁDÁLA

- 4.1 Mar a sonraíodh in Alt 3 den Acht ní ghabhfaidh duine do chorr-thrádáil i limistéar corr-thrádála mura duine é, nó mura seirbhíseach nó gníomhaire é atá ag gníomhú sa cháil sin do dhuine, a shealbhaíonn ceadúnas corr-thrádála ag a bhfuil feidhm de thuras na huairé agus gur corr-thrádáil í atá de réir an cheadúnais.
- 4.2 Is í an Chomhairle a eiseoidh Ceadúnais Chorr-Thrádála.
- 4.3 Déanfar iarratas chun na Comhairle ar cheadúnas corr-thrádála 30 lá ar a laghad roimh an gcéad lá a mbeartaítear gabháil do chorr-thrádáil agus beidh an t-iarratas ar an bhfoirm mar a bheidh forordaithe i Rialacháin déanta ag an Aire.
- 4.4 Fanfaidh Ceadúnas Corr-Thrádála i bhfeidhm go ceann tréimhse dhá mhí déag.
- 4.5 Deonfar Ceadúnas Corr-Thrádála do chorr-thrádálaí ainmnithe, a údarú don duine gabháil do chorr-thrádáil i gcuas sonraithe corr-thrádála Déardaoin agus/nó Dé hAoine.
- 4.6 Ní mór don sealbhóir an táille cuí a íoc nuair a eiseofar Ceadúnas Corr-Thrádála.
- 4.7 Gearrfar táille €200.00 ar Cheadúnas Corr-Thrádála aon lae amháin in aghaidh na seachtaine - beidh táille €400.00 ar cheadúnas dhá lá corr-thrádála in aghaidh na seachtaine. Ní mór a shonrú ar an bhfoirm iarratais cé acu ceadúnas a bheidh ag teastáil – níl siad inmhálartaithe.

- 4.8 Ní aisíocfar aon táille ceadúnais sa chás go ndéanfar an ceadúnas a chúlghairm.
- 4.9 Seolfar Corr-Thrádáil de réir téarmaí agus coinníollacha Ceadúnais Chorr-Thrádála agus na bhFodhlíthe seo.
- 4.10 Ní ceadmhach ceadúnas a aistriú.
- 4.11 Féadfaidh an Chomhairle ceadúnas a chúlghairm, más deimhin leo go bhfuil na Fodhlíthe seo nó téarma nó coinníoll de chuid an Cheadúnais Chorr-Thrádála á sharú nó sáráithe.
- 4.12 Sula dtógtar cinneadh ar cheadúnas a chúlghairm, seolfaidh an Chomhairle sonraí an sárúithe agus fógra na cúlghairme tríd an ngnáthchóras poist chun an corr-thrádálaí/sealbhoir ceadúnais. Tógfar ceann d'aon aighneacht scríofa a dhéanfaidh an corr-thrádálaí/sealbhoir ceadúnais sula dtógtar cinneadh faoin gcúlghairm.

5. LIMISTÉAR CORR-THRÁDÁLA

- 5.1 Dáilfidh an Chomhairle cuas trádála sa limistéar corr-thrádála ar chorr-thrádálaí/sealbhoir ceadúnais. Is de rogha na Comhairle a bheidh méid agus suíomh na gcuas. Ní hionann a leithéid de dháileadh agus tionóntacht, ceadúnas nó teideal don chuas. Féadfaidh an Chomhairle dáiltí a athrú nó a chúlghairm más mian leo ní bheidh siad inaistrithe.
- 5.2 Má bhíonn an líon iarratas ar cheadúnais chorr-thrádála níos mó ná an líon cuas a bhíonn ar fáil beidh ceart forchoimeáda ag an gComhairle amháin ceadúnas a dheonadh de réir na scéime seo a leanas, chun tosaíocht a thabhairt d'iarratais:-
- | | |
|--|---------|
| (a) Corr-Thrádálaithe a d'fheidhmigh cearta díolta earraí ar Ghort an Aonaigh le breis is trí bliana anuas ar bhonn leanúnach go díreach sular seoladh iarratas ar cheadúnas munar deineadh cúlghairm ar a gceadúnas. | 20 marc |
| (b) Corr-Thrádálaithe a d'fheidhmigh cearta díolta earraí ar Ghort an Aonaigh le tréimhse idir bliain amháin agus trí bliana go díreach sular seoladh iarratas ar cheadúnas munar deineadh cúlghairm ar a gceadúnas. | 10 marc |
| (c) Corr-Thrádálaithe a mbeidh sé i gceist acu earraí, trealamh nó nithe eile a d'fhás, a saothraíodh nó a deineadh sa cheantar áitiúil a dhíol. | 10 marc |
| (d) Corr-Thrádálaithe a mbeidh sé i gceist acu earraí, trealamh nó nithe eile a dhíol, nár deonaíodh ceadúnas corr-thrádála ina leith nó nach bhfuair an Chomhairle aon iarratas eile ina leith go díreach sula bhfuarthas an t-iarratas úd. | 5 mharc |
- 5.3 Beidh an trádáil ar siúl idir 8.30 r.n. agus 6.30 i.n. amháin.
- 5.4 Ní ghabhfaidh duine do Chorr-Thrádáil ach amháin laistigh den chuas trádála sa limistéar corr-thrádála a bheidh sonraithe ar Cheadúnas Corr-Thrádála agus beidh an stalla trádála go hiomlán laistigh den chuas trádála.

- 5.5 Dáilfear cuas amháin trádála ar gach corr-thrádálaí/sealbhóir ceadúnais.
- 5.6 Ceadóidh an Chomhairle an saghas stalla a úsáidfear.
- 5.7 Ní bheidh aon stalla chomh trom san ná ní leagfar ualach air a bheadh in ann brú iompair os cionn 7cg/mm.earn. a chur ar aon cheann dá chuid tacaí ná ar an ndromchla ar a mbeidh sé suite.
- 5.8 Ní bheidh aon stalla níos airde ná 2.75m ar airde (ó leibhéal na talún).
- 5.9 Ní mór do ghineadóirí a úsáidfear i dteannta stallaí géilleadh do leibhéil inghlactha gleo i.e. faoi bhun 55db(A) – nuair a sheasann db(A) don leibhéal deicibeilí agus éileofar deimhniú déantóra chun na sainchuntair a chruthú.
- 5.10 Coimeádfaidh gach corr-thrádálaí/sealbhóir ceadúnais a c(h)uid earraí, trealamh nó nithe eile laistigh dá c(h)uas trádála féin. Ní bheidh aon earraí ná nithe crochta os cionn an limistéir atá lasmuigh den chuas trádála a dáileadh.
- 5.11 Ní mór do chorr-thrádálaí/sealbhóir ceadúnais stallaí agus gach earraí is nithe eile a thógaint as an gcuas trádála agus as an limistéar corr-thrádála nuair a bheidh an lá trádála caite.
- 5.12 Ní fhágfar stallaí ná nithe ar chuas trádála ná in aice leis ag uair níos luaithe ná uair a chloig roimis tús na trádála.
- 5.13 Beidh sé de cheart ag an gComhairle stallaí, feithiclí, trealamh agus nithe eile a thógaint má sháraítear na Fodhlíthe seo agus iad siúd á bhfágaint sna limistéir chorr-thrádála.
- 5.14 Ní mór do chorr-thrádálaí/sealbhóir ceadúnais a c(h)uas corr-thrádála a choimeád go néata glan, saor ó bhruscar, is faoin gcorr-thrádálaí/sealbhóir ceadúnais a bheidh sé a c(h)uid socruithe féin a dhéanamh chun bruscar a chur de láimh.
- 5.15 Ní fhágfar feithiclí laistigh den limistéar corr-thrádála ach amháin iad siúd a mbíonn gá leo don chorr-thrádáil.
- 5.16 Ní fhágfar feithiclí laistigh den limistéar corr-thrádála thar oíche.
- 5.17 Ní bheidh na Fodhlíthe seo i bhfeidhm ar na laethanta seo a leanas:-
- Lá an Aonaigh (an dara Satharn d’Fheabhra : an triú Satharn de Bhealtaine: an triú Satharn de Mhí na Samhna) in aghaidh na bliana
 - Le linn Aonach an Phoic (an tréimhse idir 3 Lúnasa agus 17 Lúnasa) in aghaidh na bliana

6. BAINISTÍOCHT

- 6.1 Duine a iarrfaidh ar an gComhairle ceadúnas corr-thrádála a dheonú dó tabharfaidh sé don Chomhairle pé faisnéis a iarrfar i bhfoirm Iarratas ar Cheadúnas atá forordaithe de bhun Alt 4 den Acht chomh maith le pé faisnéis eile a iarrfaidh an Chomhairle chun a cumhachtaí agus a feidhmeanna faoin Acht a fheidhmiú. Mura gcomhlíonfaidh an duine an Fodhlí seo féadfaidh an Chomhairle diúltú an Ceadúnas a thabhairt dó.

- 6.2 Féadfaidh an Chomhairle ceadúnas corr-thrádála a chúlghairm más deimhin leo go bhfuil coinníoll de chuid an cheadúnais á shárú nó sáraithe nó má deineadh an duine dar deonaíodh é a chiontú i gcion i ndáil le hearraí a allmhairiú, a bheith ina sheilbh nó a dhíol fad is a bhí sé/sí ina s(h)ealbhóir ar cheadúnas corr-thrádála faoin Acht.
- 6.3 Ní bheidh an Chomhairle freagrach as maoin, earraí nó trealamh d'aon saghas a leagfar nó a fhágfar ar aon chuid den limistéar corr-thrádála ná as aon chaillteanas, damáiste nó díobháil a tharlóidh de dheasca gníomhartha na gcorr-thrádálaithe/sealbhóirí ceadúnais.
- 6.4 Slánóidh na corr-thrádálaithe/sealbhóirí ceadúnais an Chomhairle ar aon éileamh a tharlóidh de dheasca iad a bheith ag gabháil do chorr-thrádáil sa limistéar corr-thrádála agus soláthróidh siad don Chomhairle deimhniú go bhfuil clúdach reatha árachas slánaíochta acu sa mhéid €6.4 milliún chun sásamh na Comhairle.
- 6.5 Ní dhíolfaidh na corr-thrádálaithe/sealbhóirí ceadúnais aon ní eile seachas na hearraí a shonraítear ar an gceadúnas.
- 6.6 Agus an trádáil ar siúl cuirfidh na corr-thrádálaithe/sealbhóirí ceadúnais an ceadúnas ar taispeáint agus beidh sé sin go soiléir soléite ag an bpobal.
- 6.7 Ní mór do chorr-thrádálaithe/sealbhóirí ceadúnais a dhíolfaidh bia cloí leis na Rialacháin Sábháilteachta Bia agus le riachtanais Feidhmeannacht na Seirbhísí Sláinte.
- 6.8 Ní chraolfar caint agus /nó ceol os ard ó aon chóras méadaithe meicniúil nó leictreach nó ó aon ghléas raidió nó gléas seinnte ceoil ag aon chuas trádála.
- 6.9 Ní thaispeánfar ar díol ná ní dhíolfar aon stoc beo sa limistéar corr-thrádála.
- 6.10 Ní chuirfidh corr-thrádálaithe/sealbhóirí ceadúnais bac ar thrácht ná ar choisithe.
- 6.11 Ní chuirfidh corr-thrádálaithe/sealbhóirí ceadúnais bac ná ní bheidh siad ina gcúis bhaic in aon slí ar bhóthar poiblí, cosán ná ar cheart slí poiblí.
- 6.12 Ní ghabhfaidh corr-thrádálaithe/sealbhóirí ceadúnais don trádáil ar shlí a chuirfeadh míisiam ar dhuine nó a mbeadh dealramh uirthi go bhféadfaí a leithéid a dhéanamh.
- 6.13 Is í an Chomhairle a cheapfaidh daoine mar Oifigigh Údaraithe chun críocha an Achta agus chun na Fodhlíthe seo a chur i bhfeidhm.
- 6.14 Ní mór do chorr-thrádálaithe/sealbhóirí ceadúnais déanamh de réir iarratas agus ordúithe dleathacha ó Oifigigh Údaraithe nó ó bhall den Gharda Síochána.
- 6.15 Beidh corr-thrádálaithe/sealbhóirí ceadúnais freagrach as géilliúlacht a gcuid seirbhíseach, gníomhairí, cúntóirí agus fostaithe do na Fodhlíthe seo.
- 6.16 Beidh ceart forchoimeáda ag an gComhairle aon Cheadúnas Corr-Thrádála a dheonú nó a dhiúltú.
- 6.17 Má iarrtar orthu é ní mór do chorr-thrádálaithe/sealbhóirí ceadúnais a gCeadúnas reatha Corr-Thrádála a thaispeáint d'Oifigigh Údaraithe nó do bhall den Gharda Síochána.

Déanta faoi Shéala Oifigiúil Comhairle Contae Chiarraí

Dátaithe an 4ú lá seo de Nollag 2012

I LÁTHAIR nuair a greamaíodh Séala Oifigiúil Comhairle Contae Chiarraí leis seo :-

Gearóid Ó Briain
An Méara nó Fostaí Ainmnithe



Beidh na Fodhlíthe seo i bhfeidhm ar an 7ú Eanáir, 2013